

Zuccaru filatu a la fera

Un jornu passianu a la fera, un firaru arridennu mi dissi: l'assaggiassi, si lu mittissi 'mucca, è zuccaru filatu. Mi parsi malu a diricci di no e ringraziannulu l'accittavu.

Mancu lu misi 'mucca ca squaglià Arrivatu nintra, misu ntà na sdraia, cu l'occhi chiusi, mi parsi di trovarimi 'ncapu ddu zuccaru filatu ca vulava, nun sapennu unni mi purtava. Tuccavu lu celu cu li mani, vulannu ancora mi purtà 'nta 'na stidda, la cchiù bedda, propriu nnì la stidda di mezzìu.

C'era un lustru ca picciavanu l'occhi, arrivavu giustu 'ntempu di manciari.

C'era 'na tavulata ca nun finiva ma, ognunu si pigliava chiddu ca cci appativa, c'era ogni grazia, ogni beni di Diu. Comu trasivu, mi ficiru 'na festa. Pi primu San Petru ca mi grapi la porta mi detti lu ben vinutu e mi fici vidiri un mazzuni di chiavi dicennumi: comu veni arrè, cu sti chiavi po iri unni vò. Ora assettati cu natri e mancia.

Cu mi salutava di ccà e cu mi chiamava di ddà. Eranu tutti canuscenti, tutti amici e parenti. C'era lu dutturi, lu scarparu, lu parrinu cu tutti li fedeli, l'avvucatu, lu varberi, lu sartu, lu 'ngignerì, l'onorevuli e lu 'nfirmieri,

'nzumma c'eranu genti di ogni cetu, tutti c'arridivano, manciavano e si scialavanu.

Chiddu c'aviva a lu giru mi dissi: ma comu vinisti? Nun t'aspittavamo ora! Iu mancu sappi comu rispunnicci, e facennu finta di nenti cci chiesi: e tu comè ca si ccà, avi tanti anni can nun ti viu. E ... beddu mè, ora avi assà ca sugnu ccà, ora mi la passu bona, nun n'hau ne acciacchi e mancu malatii, passavu a la bella vita, nun mi manca cchiù nenti, chiddu ca vogliu haiu. Ogni tantu cu l'amici 'n'affacciamu pi vidiri chiddu chi succedi dda sutta, e ti dicu sinceramenti lu Signuri sa chi vitti ca mi fici veniri ccà.

Ti 'n'adduni quantu semu? E nuddu ca si sciarria, ccà nun ci su guerri, nun c'è droga, nun c'è odiu, nun c'è 'mmidia, nun ci su patruna 'ne garzuna, semu tutti 'na famiglia. Ma la cosa cchiù bella sa qual'è ...?

Ca nun ci su sordi, nun s'accatta nenti, ognunu ca disidira na cosa si la piglia, ccà semu nnì la paci di Gesù.

Cosa di bellu veru, rispunnivu, ... ma ccà 'mparadisu semu! San Petru, mi battì la spada cu la manu e mi dissi: bravu, ora lu capisti, facisti tanta strata e nun ti pirdisti, ma allestiti a manciari e gh'iritinni, pirchè ancora nun nnè ura pi tu stari ccà. Comudu piccomera 'ni la sdraia, un gridu mi fici satari, dicennumi: vidi ca fari, allestiti, vattinni a travagliari. A menti mè pinsavu: ma pirchè m'addivigliavu.